

Ranzmbanj Gyaeunde

美丽的乡村

武鸣县太平镇庆乐小学六年级 危泓璟



Ranzmbanj gou gig gyaeunde!
Gyanghaet mbwn ngamq rongh-momj, ndaw mbanj ranzranz congh-heuq hoenzfeiz couh hwnjfofod lo. Yawj giz gya, dinbya goengqbya vanzlij dwg saekndaem, hoeng dingjbya sangvid haenx gaenq deng daenggoenz ciuq dwk henjrwrgw. Gaeqboux haen'oo, daxau bohlungz gwed cae gwed rauq yaek bae gengnaz lo, mehsimj mehbaj daek haeuxcuk roengz ndaw doengz bae, caiq yungh mbawcej duk geng gyu ndeu, daiq bae naz, neix couhdwz gij haeuxngaiz gyoengqde lo. Seizneix daenggoenz gaenq hwnj sang, duzmou ndaw riengh daeuhnye'nye, daxbuz daxgoeng ganjvaih dawz

mok bae gueng mou; lwgnyez cuengq duzgaeq duzbit okdaeuj, vanq haeux youq gwnz dieg hawj gyoengqde gwn, duzgaeq duzbit angq ndaej swenjgogo hemqab'ab. Gwn imq le, duzgaeq ndonj haeuj ndaw ndoeng bae angq, duzbit buet roengz ndaw daemz bae youzraemx, yaepyet ndaw mbanj caemdingh roengzdaeuj lo. Ndaw naz ndaw reih cix nauhnauh yiedyied. Bousai dawz cae dawz rauq, mehmbwk bau gyaj ndaemnaz, sing hat vaiz, sing gangjvaih..... Dauqcawq yienh ndaej nyaengq-foedfoed.

Banngaiz, gou byaij gvaq benq ndoengfaex ranzmbanj, raqraq rumz liengzsis ci haeuj naj daeuj, byoem-

gyaeuj mbinyagyag, ndaw rumz cab miz heiq homfwd youh singjsien. Loeklak miz song sam sing duzroeg daj ndaw ndoengfaex cienz daeuj, daekgaeuj henz roen hemqgitit. Va ndoi hoengzhoengz henjhenj vava loegloeg, lumj ndaundeiq vanq youq gwnz dieg nei. Gou dingz din roengzdaeuj, yiengjsouh cungj gingj gyaeu heiq hom neix, cungj mbouj siengj byaij bae.

Daenggoenz miz di naetnaiq lo, siengj laepda ninz lo. Gyoengq-vunz guhhong boux gaen boux dauqma, gij hoenzfeiz youh dauq swng hwnjfofod lo. Gwn caeuz gvaq le, mbanj boux bae cunzranz, doxyaeng gij hongsaeh ngoenzcog, miz mbanj youq ranz ganggoj yawj densi. Gij rongh ronghndwen saj youq benq dieg ranzmbanj, henz naz go'nywj gaenq haeujninz, gwnz ndang venj miz naed raemxraiz. Hoeng henz roen vanzlij nauhyied raixcaix, daekgaeuj ciengqgo duzgoep daeuj buenx, couh lumj diuzgo rwenzrwd ndeidingq ndeu.

Ranzmbanj gou yienznaeuz mbouj dwg lajbiengz cei q gyaeu, hix mbouj dwg gig fouqmiz, hoeng youq ndawsim gou, ranzmbanj gou cei q gyaunde, ciengxlwenx ndaej hawj gou gamjdaengz raejruhrub.

(指导老师: 林锦凤 陆全耀)



Vat Byanouq

挖泥鳅

贵港市覃塘区蒙公乡高占小学二(2)班 邓良宇

Youq henz mbanj ranz daxbuz gou miz aen daemz ndeu, ndaw daemz miz haujlai byanouq. Moix bi seizcou ndaw daemz raemx mboek le, dou couh bae ndaw daemz vat byanouq.

Bi'gvaq seizcou, miz ngoenz singhiz roek ndeu, gou caeuj biujgo bae ndaw daemz vat byanouq. Youq ndaw daemz, gou yawjraen ndaw boengz miz haujlai congh iq, biujgo swnh congh iq vat roengzbae, gou cam biujgo: "Vihmaz swnh aencongh vat roengzbae ne?" Biujgo gangj: "Aenvih miz congh, hojnaengz couh miz byanouq youq laj ndoj."

Gou ciuq gij yiengh biujgo bae guh, raen miz congh iq gou couh vat roengzbae, gou song fwngz vat roengz boengz bae, haidaeuz cij vat ndaej boengz mbouj vat ndaej byanouq, hoeng gou mbouj doeknaiq, gou youh laebdaeb ra congh vat, caen vat ndaej byanouq dahraix lo. Duz byanouq raeuzrwd, baez gaem dawz couh rod deuz, doeklaeng gou aeu fwngz menhmenh gop dawz de, baezneix de deuz mbouj ndaej lo, gou couh menhmenh cuengq roengz doengj iq bae. Gou caeuj biujgo vat daengz banhaemh, dou vat ndaej haujlai byanouq, gou caeuj biujgo angqhoho dawz bya ma ranz lo.

Ngoenzneix gou caen sim'angq ha! (指导老师: 韦春柳)

Hag Cawj Byaek

学煮菜

贵港市覃塘区蒙公乡凌寺小学三(2)班 陆彦名

Gou cuengqhag ma daengz ranz, haeuj ranz yawjraen gwnz daiz miz mbaw ceij ndeu, gwnz ceij sij: "Siuj-hungz, daxmeh bae guh hong lo, mwngz swheij gag cawj byaek ba." Gou ndawsim gag naemj: Dwg ha, daxmeh ciengzseiz youq rog guh hong, ma ranz lij cawj ngaiz cawj byaek hawj gou gwn, geijlai sinhoj


ha. Gou gaenq sam nienzgaep lo, swheij wnggai rox cawj byaek lo. Naemj daengz gijneix, gou gietdingh gag cawj byaek.

Gou aeu byaek daeuj swiq. Gou sien dawz mbawbyaek henjgeq mbaet bae, caiq aeu raemx daeuj swiq, gou swiq byaek ndaej seuqswtswt, yienzhaeuh aeu cax daeuj cab, gij byaek deng gou cab ndaej miz hung miz iq, miz dinj miz raez. Gou diemj feiz caj rek hoengz ndat le, cuengq di youz roengz rek bae, gaen dwk dawz byaek cuengq roengz rek bae, cij dingqny ndaw rek yiengj "bibi baba", gou yungh gucanj aeu byaek fan bae canj dauq, youh gya di raemx roengz rek bae, daihgaiq sei haj faen cung, byaek couh cawj cug lo.

Gou dawz byaek daek haeuj ndaw buenz le, aeu dawh daeuj cimz, o, gou lumz cuengq gyu lo. Gou ganj-gip cuengq di gyu roengz ndaw byaek bae gyaux.

Daxmeh guh hong dauqma, cam gou naeuz: "Lwg ha, ngoenzneix byaek cawj ndaej baenzlawz yiengh ha?" Gou mbouj ndei ei qsei q dap naeuz: "Gou dawz byaek cawj cug lo, hoeng gou lumz cuengq gyu lo, doeklaeng cij gya roengzbae, mbouj ndei gwn geijlai." Daxmeh naeuz mbouj youqgaen, lai cawj geij baez couh ndaej lo. Daxmeh lij haenh gou naeuz gou majhung lo, rox guh saeh lo. Gou ndaej bang daxmeh guh di saeh, ndawsim gou diemzsis.

(指导老师: 杨金梅)



Dahnuengx Dwggayez

可爱的妹妹

贵港市覃塘区蒙公乡凌寺小学四(1)班 覃奕

Daxau gou miz sam dah lwg, dahlwg daxau hix dwg dahnuengx gou. Dahnuengx gou yienznaeuz mbouj caeuj gou caez youq, hoeng moix ngoenz gyoengqde cungj gaen daxgoeng gou daeuj ranz gou guhcaemz. Gangj daengz gyoengqde caen dwg hawj vunz youh caengz youh gyaiez ha. Daegbied dwg song dah daihngaih songseng haenx engq dwg hawj gou mbouj miz banhfap.

Song dah songseng neix bineix ndaej seiq bi lo, song de maj ndaej gig doxlumj, danghnaeuz mwngz mbouj sijsaeq yawj aen geiqhauh

gwnz naj haenx, mwngz gaenbonj faen mbouj ok bouxlawz dwg ceh bouxlawz dwg nuengx bw? Hoeng, doenggvaq singyaem gyoengqde gou couh faen ndaej ok, dahcej singyaem lai gok di, dahnuengx singyaem lai laux di.

Geiq ndaej miz baez ndeu, sam dah nuengx neix youq ranz gou guhcaemz. Gou cingqngamj daj gwnz haw cawx ndaej bonj saw lienzvanzva he ma, byawz rox gou ngamq cienq ndang hwnj laeuz aeu di doxgaiq, bonjsaw moq gou gaenq deng song dahnuengx songseng sik vaih lo. Dangseiz gou huj raixcaix, lienz-

muengz sing hung ndaq naeuz: "Sou song dah manz neix, siengj ra moeb ha? Vih maz dawz bonjsaw moq gou sik vaih bae ha? Baezlaeng gaej daeuj ranz gou guhcaemz lo, vaiqdi okbae!" Song dah neix raen gou sing hung ndaq song de, caengz caj gou moeb, song de cix vunzyak sien gauqciengq lwnh daxgoeng lo: "Daeggo mbouj hawj saw dou yawj, dawz saw moq yo hwnjdaeuj, dou siengj dawz daeuj yawj, hoeng saw cix deng daeggo sik vaih bae mbouj hawj dou yawj lo." Dingq daengz song de yienghneix gangj, gou caen dwg huj dahraix lo.

Daxgoeng doeklaeng lij gangj gawq vah hawj gou engq huj ndeu: "Mwngz dwg daeggo, mwngz hung lo, hix roxsah lo, mbouj ndaej haep dahnuengx bw." Gou ndawsim gig mbouj vuen, baezlaeng song dah neix mbouj rox bienqbaenz baenzlawz ne!

Gyoengqde miz seiz hix dwggayez raixcaix. Miz baez he, mehsimj gou daj Gvangjdungh dauqma, cawx ndaej haujlai gigwn ma, mehsimj mbouj heuh gyoengqde dawz gigwn okdaeuj baen gou. Gvaqlaeng song de cix moix vunz ndaw daeh cang rim gigwn haenx, soengq daeuj hawj gou, ndaw bak lij gangj: "Daeggo, ngoenzcog gou daiq lai di daeuj hawj mwngz, hoeng mwngz gaej gangj hawj daxmeh gou nyi bw. Daxmeh naeuz mbouj ndaej dawz okbae, vunz lai mbouj gaeuj gwn."

Mwngz yawj, neix couhdwz dahnuengx gou, dwgcaengz youh dwggayez. (指导老师: 陆冬群)